

全華叢書



金華叢書



楓山章先生實紀卷之四目錄

外傳

棘寺名宦傳

林希元

太子少保章文懿公傳

鄭曉

章楓山先生傳

李禎

車山先生集

李氏

水子少府集

莫氏

林氏

林氏

林氏

林氏

楓山章先生實紀卷之四

郡後學胡鳳丹月樵校梓

棘寺名宦傳

林希元

公諱懋字德懋號闇然翁晚號澱濱遺老蘭谿純孝鄉人也上世遷自建之浦城人國朝有叔良者以人才徵不就公之曾祖也叔良生邦和邦和生申甫申甫生公母吳氏公生而岐嶷資性穎異書數過輒成誦不忘年十五補博士弟子嗜學如渴治易務深入或爲進取憂公曰當有巨眼者自信不惑天順壬午

魁鄉試丙戌中會試首卷劉學士定之主考果物色
焉登殿試二甲改庶吉士入讀中秘書成化丁亥冬
除編修月餘會元夕內府張燈命館局分題賦詩公
謂燈火非昭德之器詩賦非論思之業與編修黃仲
昭檢討莊泉上疏諍之忤旨命杖於闕下俱謫官直
聲震朝野時稱三君子先是修撰羅倫亦以論元宰
奪情謫又稱翰林四諫公知臨武以言者論救與黃
仲昭俱改南京大理評事既至留心職業日取刑書
故牘詳閱之遂至精練庶獄評讞老吏自謂不及法

所當執雖貴卿莫奪也南俸入視北爲縮例益以堂
隸顧直之贏公獨無益三年考績遷福建按察僉事
閩有番舶銀鑛屢爲患公至建議許民與番互市夷
商兩便弛銀鑛禁聽民採取不復盜患遂息浮稅病
民令以海田抵之泰寧寇作梗託清戎擒捕悉就擒
沙尤飢盜起開倉賑濟卽時解散善政種種都御史
張瑄分陝福建雅重公每事必咨巡察有不相得者
加之蠲厲成疾因有去志考績至京遂疏致政吏部
尙書尹公旻固畱不可三詰而終不變乃可之時年

四十一至家卽杜門足不至府城奉親之外日惟讀書講學爲事甘貧守道若將終身學士有志者束修請誨無間遠近常往來楓木庵中學者稱曰楓山先生廷臣交薦孝廟初政圖任儒宿北以謝公鐸爲祭酒南以屬公公方在制添設司業虛缺以待及就官開示近裏南士意若無奇久之先德化整規條勤答問師道頓改六館之士始帖然心服恨得之晚姑蘇尤樾母病例莫歸省日夜悲泣公令歸或言公曰吾寧以此獲罪不忍絕其母子之情也人益歡服兩疏

學政時政宿弊不報再疏乞休不允正德改元陳勤
聖學隆繼述謹大婚重詔令敬天戒五事先後五疏
乞休又不允居無何引年以請凡三疏始允尋轉南
京太常寺卿辭進南京禮部侍郎又辭詔許致仕公
既退而逆瑾之難作縉紳相繼蒙禍人尤服其先見
當道咸疏公耆儒宿德詔有司歲時存問以風天下
嘉靖改元陞南京禮部尙書致仕辭弗允辛巳歲且
暮忽構疾親朋子姪更迭問候至屬纊語不亂衢守
林有年至疾已劇臥榻上與論古今天下事甚悉次

夕與姪贊論君大夫保國保天下之道因及春秋列國名卿惟許士會父子庶幾歲除令親友各歸守歲嚮晦遂歿年八十六是日未旦有星墜所居之前山有司以聞與葬祭贈太子少保諡文懿公胸懷夷坦不修城府度量汪汪不見涯涘與人言輒露肝膽人與之言則信與之交則親或詐亦不逆億也見人有善不啻在己汲引後進惟恐不及居常無甚異同至臨大事決大議是非可否確乎不拔性寡嗜慾衣服飲食宮室器用隨遇而安薄田僅自給不求增益辭

受取與皆必以道出處去就尤不放過一毫不慊重
鍾弗顧故自翰編以至八座立朝僅四十日官不遇
三考乞休凡二十餘疏難進易退非特今世古亦難
之其心常在天下每聞進一善人行一善政喜動顏
色否則愀然不樂夜必露天焚香默以親賢遠姦康
國庇民爲禱民生利害輒爲上官言之其學以闕閭
濂洛爲宗本之自得非有傳授亦間氣所鍾宇宙有
數也於書無所不讀於天下事無不理會要在精究
而力行之不落口耳不涉支離故能眞見獨到洞貫

道妙其發之議論精實切當多有前賢所未發者嘗
謂人心有小大大以窮理小以慎獨謂學術去程朱
已久又大壞必須真聖賢出方能救得謂文廟祀典
須進周子兩程子張子朱子於配享之位方允嘗謂
天地元氣到後來亦衰弱生出人來都厭厭不振謂
政體始於格君心收人才固民心格言至論不一而
足皆其所獨得者一時同志若羅一峯胡敬齋謝方
石莊定山諸公皆極推許諸公皆蚤世惟公年踰大
耄巍然獨存殆天壽之以壽斯道也文章不甚求工

達意而止或以相諷曰小技爾予弗暇或勸以著述
曰先儒之言至矣盡矣又何加焉第刪其繁蕪可也
嘗欲摘選程朱後諸儒經書粹語爲集說及刊宋史
之謬患力不足而止生平所著惟蘭谿金華鄉賢祠
誌及遺文數卷而已子孫皆天歿少子接晚始生公
歿方五歲贊曰余觀楓山先生翰林一疏立朝大節
表表在人厯官所至雖未盡見其設施皆不與俗同
參以平生議論其胸中所存與經濟大略因可概見
使得盡見之行功業當未易量而志卒弗酬是則世

道之不幸也要其心拳拳在天下豈果於忘世者其所以難進易退必有其故矣然鴻羽鳳毛聳當時而風後世且使今世仕者猶知聖賢出處去就之義古道不至於淪喪其功比之兼善豈可以多寡論哉考其學問淵源殆可以接四先生之席而爲朱門之游夏其拳拳以道術分裂程朱去遠爲慮又謂藝有三巨擔棄道左無人擔則其憂道之心與其所以自任之意隱然見於言外矣

太子少保章文懿公傳

鄭曉

公名懋字德懋蘭谿人成化二年禮部貢士第一公
少游庠校讀書學問負經濟志略然不自衒露進士
入翰林爲庶吉士逾年除編修內庭張燈下詞臣賦
詩公謂莊昶黃仲昭曰國家無事海宇治安內庭燃
燈朝士踏歌傳之往史已非盛事此蘇長公所以有
疏而深惜其君之不用也今天子仁聖孝奉二宮將
以備耳目之娛極天下之養則斯舉固足以爲樂然
大孝養志吾輩盍諫明日三人同上章以培養聖德
爲言上怒杖三人闕下左遷知臨武縣稱三君子時

羅一峯論內閣大臣起復非禮亦謫官又稱爲翰林
四諫公未行給事中毛玉論救改南京大理左評事
一考陞福建按察僉事毅然以振風紀爲己任雖盡
心職業顧直以德學顯而不以吏事名其議處番貨
通貿易便商聽福安民採鑛絕盜託清軍擒泰寧之
寇先賑濟平尤沙之賊善政卓然一考至吏部乞致
仕時年四十一閉門卻掃跡弗入城府四方弟子執
業問難顯賢名公卿巖穴隱士仰風接軫貧無供具
刈蔬脫粟餉之家食二十餘年公卿臺諫累薦弘治

十二年召謝文肅公爲北監祭酒十四年召公祭酒
南監時遭父喪力辭詔增司業員聽終制赴官十六
年服闋上任謹矩度尙德化厲廉恥諸生翕然向風
尋上修舉學政條陳弊政二疏正德元年陳言治道
要務五事曰勤聖學隆繼述謹大婚重詔令敬天戒
再疏乞休未允任滿三載疏引年不待報歸復三疏
始得請五年陞南太常卿辭六年陞南禮部侍郎辭
致仕嘉靖初進南禮部尙書致仕公平生襟懷坦蕩
不修城府器度宏偉不見涯涘望之龐朴卽之和厚